



# STINAPA TA INFORMA

## SALIÑANAN

Boneiru ta den e área tropikal seku. Tin aña ku tin mas áwaseru i tin ku ménos, pero e averahe ta 500 mm pa aña. Esei no ta masha hopi, muchu tiki por ehèmpel pa hasi agrikultura na eskala mas grandi. E paisahe ta seku. E kadushi, ku lo bo spera di topa mas lihé den un paisahe desierto, ta abundante. Tin biaha bo ta haña temporada ku hopi áwaseru i e ora ei e isla ta bira un bèrdè fabuloso. I bo ta mira flor tur kaminda. Pero pa e parti mas grandi di aña, Boneiru ta hopi seku i ta un par di milimeter di áwaseru so ta kai. Pero mes un típiko ku e paisahe ku tur su kadushinan ku ta sali krese haltu for di e yerba di mondi, ta e saliñanan i e awanan salu ku ta rondoná nan. Boneiru tin hopi saliña: Peliké (Pekelmeer), saliña di Vlijt, Mathijs, Frans i Tam i di mes tambe e fabuloso Gotomeer. Klein Bonaire tambe tin saliña. Sierto saliña, manera Gotomeer i Peliké tin un 'status protehá' danki na e Akuerdo di Ramsar (E akuerdo aki ku a sera na e siudat Ramsar na Iran ta protehá tur 'wetlands' importante na mundu). Un saliña ta un lago òf boka grandi ku no tin konekshon mas ku laman dor ku un dam di koral morto no ta laga e awa pasa. E awa por sali solamente for di e saliña ora ku e ta evaporá. Asina e salu ku tin den e awa ta keda atras, poniendo ku pokopoko e awa ta bira mas salu. E konsentrashon di salu den e awa ta dependé di e kantidat di awa ku ta dreña den e saliña. Tuma por ehèmpel Gotomeer. Su awa lo ta ménos salu den temporada ku roinan ta basha nan awa dushi den dje. Den temporada seku e awa lo ta hopi mas salu. Especialmente pa paranan di awa e saliñanan ta di gran importansha pasobra nan ta nan fuente di kuminda. Flamingonan ta gusta bin kome den e lodo yen di bestia di laman chikitu. Pero saliñanan tin un otro funshon importante tambe. Nan ta kolektá i filtra e áwaseru. Nan ta perkurá pa no tin muchu alimentashon i tera ta spula bai laman ku e awa di roi. Pasobra esei ta funesto pa e koral. E kolekshon di awa den e saliñanan ta importante specialmente ora ku tin áwaseru pisá. Si áwaseru por bai laman sin estorbo, bo ta mira un strepi maron diki di tera den e awa blou. Ora ku esei pasa, ku un tiki suerte koriente di awa ta spula e tera for di e koral. Pero si e pasa regularmente òf e tera ta keda riba e koral, e tera por stek e koral. Ademas nutriente tambe ta bai laman, lokual por kousa un desbalanse den e naturalesa bou di awa. Saliñanan ta yuda protehá e koral. I p'esei nos mester protehá e saliñanan. *Skirbí pa Trix van Bennekom, tradusí pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**